

**Savaateqarfinnik pilersitsinernut tapiissuteqartarneq pillugu
Namminersornerullutik Oqartussat nalunaarutaat nr. 23, 8. august 1993-
imeersoq.**

Savaateqarneq pillugu Inatsisartut inatsisaat nr. 1, 21. april 1988-imeersoq
Inatsisartut inatsisaatigut nr. 8-kkut 13. maj 1993-imeersukkut allanngortinneqartoq
naapertorlugu aalajangersarneqarpoq:

§ 1. Savaatilinggorlaanut tapersiissutitut savaateqarfiliornep nalaani
tapiissuteqartoqarsinnaavoq.

Imm. 2. Savaateqarfinnut ataatsimut savaateqarfiliornep imaluunniit
savaateqarfiliqqinnermut ataatsimut ataasiaannarluni taamaallaat
tapiissuteqartoqarsinnaavoq.

Imm. 3. Tapiissutit sivisunerpaamik ukiut pingasut ingerlanerini
akiliutigineqartassapput.

§ 2. Inuit savaateqarneq pillugu inatsimmi piumasaqaatinik naammassinnissimasut
tapiiffigineqarnissamik qinnuteqaateqarsinnaapput,

1) savaateqarfik nutaarluinnaq tunngavianiit aallartittariaqassagunikku imaluunniit
2) savaateqarfik imatut pissusilik tigusimagunikku savaateqarneq imminut
akilersinnaasunngortinniarlugu tunngavianiit savaateqarfiliqqittariaqarlutik.

Imm. 2. Qinnuteqaat, Savaatillit Peqatigiit Suleqatigiissunit uppersarlugu
atsiorneqarsimasoq, naalackersuisunut aamma kommunimut savaateqarfiup
inissisimaffigisaanut nassiunneqassaaq.

§ 3. Naalackersuisut Savaatillit Peqatigiit Suleqatigiissut aamma "Savaatillit
Siunnersorteqarfiat" isumasioreerlugit tapiissuteqartoqarnissaanik aalajangiissapput.
Naalackersuisut aalajangiiniarnerminni ilaatigut pingaartissinnaavaat

1) savaateqarneq tapiiffigineqartussap siunissami pi- ngaarnerutillugu
inuussutissarsiutigissagaa. Tamatuma nalilerneqarnerani savaateqarfiup angissusia
tunngavigineqassaaq,

2) maskiinat atortut, narsaatit neriniartitsisarfillu aamma savaatit imminnut
naapertuuttumik annertussuseqarnissaat,

3) narsaatit pilersinneqareersinnagit imaluunniit pilerseqqinneqareersinnagit
ivikkanillu nerukkaatissat siulliit pigineqalereersinnagit savaateqartoqalissanngitsoq
taakkuluunniit amerlisinneqassanngitsut,

4) savaatillip ingerlatsinermut illuutit ungalullu sanareersimangippagit imaluunniit
iluarsaateersimangippagit savaateqartoqalissanngitsoq imaluunniit taakku
amerlisinneqassanngitsut aamma

5) savaateqarfiliorneq pilersaarutigineqartutut ingerlanneqassasoq.

Imm. 2. Naalackersuisut ataasiakkaanut tunngatillugu tunngavilersuutit naleqquttut
allat pingaarnerutissinnaavaat.

§ 4. Tapiissutit amerlassusissaat akiliutigineqartussallu aveqatigiinnissaat kommuni pineqartup Naalackersuisullu akornanni isumaqatigiissutigineqassapput.

§ 5. Naalackersuisut kommuni pineqartoq aamma Savaatillit Peqatigiit Suleqatigiissut isumasioqatigeriarlugit aalajangiisinnaapput, tapiissutit akiliutigineqartarnerat unitsinneqassaaq

1) tapiiffigineqartartup savaateqarneq pillugu inatsimmi aalajangersakkat unioqutissimassappagit imaluunniit

2) nalunaarut manna malillugu tapiiffigineqartartup tapiissutininik pisarnissaminut piumasqaataasut naammassisinnaajunnaarsimappagit imaluunniit

3) tapiiffigineqartartoq eqqunngitsunik imaluunniit paatsoorneqarsinnaasunik paasissutissiisimappat imaluunniit tapiiffigineqarnissamut paasissutissanik pingaarutilinnik nipangiussisimappat.

Imm. 2. Immikkoortoq 1-imi nr. 1 aamma 3 malillugit tapiissuteqartoqartarunnaarpat Naalackersuisut kommuni najugarineqartoq aamma Savaatillit Peqatigiit Suleqatigiissut isumasioqatigeriarlugit aalajangiisinnaapput tapiissutigineqarsimasut utertillugit akilersinneqassasut.

§ 6. Nalunaarut manna atuutilerpoq 10. august 1993.

Namminersornerullutik Oqartussat, ulloq 8. august 1993.

Hans Iversen

/

Henrik Leth